



Inatsisartut ukiakkut 2017-imi ataatsimiinneranni Naalakkersuisut, aallarnisaasunut suliffeeqanillu ingerlatsisunut, aningaaserivitsigut aqqudit naligninnaasut atorlugit attartorsinnaangitsunut, annikittunik taarsigassarsisitsinermik ukiuni sisamani misiliinissaq anguniarlugu, Inatsisissamik saqqummiussiniamik peqquneqarnissaannik aalajangiiffigisassatut siunnersuut. Misiliinerup nalaani Aningaasanut Inatsimmi ukiut tamaasa siunertamut 500.000 kr.-nik immikkoortitsisoqartassaaq. Taarsigassarsiat killilimmik annertussuseqartassapput soorlu 20.000 kr.-iniit 100.000 kr.-inut. Inatsisissatut siunnersuummi ernialersukkanik taarseraanissamik periusissaq ilanngunneqassaaq, pisortat annaasaqarsinnaanerit killilersimaarusullugu. Tamatuma saniatigut Inatsisissatut siunnersuut misileraanerup naanerani nalilersuinissamik piumasaqaammik ilaqassaaq.

(Inatsisartunut ilaasortaq Naaja H. Nathanielsen, Attaviitsoq)

(Siullermeenera)

Demokraatini isumaqatigaarput aallarnisaasartut atugaat pitsaasut pilersittariaqarmata. Nunatta ineriartornerani pingaaruteqarpoq nutaanik eqqarsarsinnaasut isumassarsiullaqqissullu namminneq suliffiutiminnik aallartitserussuseqarnissaannut kaammattornissaat, isumassarsiatik piviusunngortissinnaaniassammatigit.

Naalakkersuisut akissumminni tunngavilersuutigaat aallarnisaasartut ikorfartorniartugit suliniutit arlallit pioreersut. Demokraatini tamanna isumaqatigaarput.

Siunnersuuteqartorli ilumoorpoq oqarami annikitsumik aallarnisaasartut isumassarsiaminnut aningaasassaaleqinartut. Tassunga atatillugu annikittunik taarsigassarsisitsisarnissaq isumassarsiatut kusanartutut eqqarsaatigisariaqartutullu isigaarput.

Apeqquilli annertoq taassaavoq siunnersuutip aningaasalersornissaa. Demokraatini isumaqarpugut siunnersuut ilaannakoortumik imminut aningaasalersortoq, tunngaviummik taarsigassarsiat annikitsut utertinneqartussaammata, taarsigassarsiissutigineqartulli ajornartorsiutitaqarsinnaapput, taamaattumik annaasaqartoqarnissaa naatsorsuutigisariaqarpoq. Tassungalu siunnersuummut ilanngunneqassapput allaffissornermi aningaasartuutit. Demokraatini Inuussutissarsiornermut, Suliffeeqarnermut, Niuernermut Nunanullu allanut tunngasunut Naalakkersuisoqarfimmut amerlanerusunik aningaasaliiniangilagut siunnersuut piviusunngortikkumallugu, taamaattumik aningaasat nassaarisariaqarput aningaasaliissutaareersut iluanni. Ataatsimiititaliami suliarineqarnissaanut atatillugu innersuussutigissavarput, ataatsimiititaliaq tikkuussissasoq siunnersuut piviusunngortikkumallugu aningaasat sumi aaneqarsinnaanersut.



Demokraatini aamma kaammattuutigissuarput, Inuussutissarsiornermut Ataatsimiititaliap misissussagaa taarsigassarsiat annikitsut kommunit suleqatigalugit neqeroorutigisarnissaat soqutigineqarsinnaanersoq - immaqa aaqqissuussineq 50/50 atorlugu, Namminersorlutik Oqartussat kommunillu assigiimmik akiliisarlutik.

Tamatuma kingorna Demokraatini isummerfigivikkumaarparput isumaqarnerluta siunnersuut manna tapersersortariaqartoq.

Taamatut oqaaseqarluta siunnersuutip Inuussutissarsiornermut Ataatsimiititaliami suliareqqitassanngorlugu innersuupparput.